

01/11/2001

Ambang Klasik tunggu keputusan mahkamah

KUALA LUMPUR, Rabu - Ambang Klasik Sdn Bhd (AKSB) akan menunggu keputusan mahkamah berhubung kes penahanan artisnya, Yassin Yahya dari kumpulan lawak Senario, sebelum mengambil sebarang tindakan lanjut terhadapnya.

Pengurus Senario, Mahathir Mohd Sidi, berkata AKSB yang bertanggungjawab menerbit dan mengedarkan album kumpulan itu, tidak teragak-agak menamatkan kontrak dengan Yassin jika dia didapati bersalah.

Yassin menandatangani Perjanjian Rakaman dan Pengurusan Artis dengan AKSB pada 12 Julai 2001 dan pada 22 Oktober lalu, dia memohon pelepasan daripada menjalankan tugasnya sebagai artis AKSB bagi membolehkannya menyelesaikan masalah peribadinya.

"Pihak kami sudah meluluskan pelepasan yang dipohonnya berkuat kuasa tarikh itu sehingga 21 Januari 2002," katanya.

Yassin, 23, didakwa di Mahkamah Majistret, di sini, semalam atas dua tuduhan memiliki dua gram ganja dan 34 botol kecil cecair warna hitam yang disyaki dadah berbahaya.

Dia yang didakwa bersama lima lagi lelaki, mengaku tidak bersalah atas dua tuduhan itu.

(END)